



Comisiynydd y
Gymraeg
Welsh Language
Commissioner

Fframwaith Llywodraethiant

Dyddiad Cyhoeddi: Mehefin 2024
Dyddiad Adolygu: Mehefin 2026



Comisiynydd y
Gymraeg
Welsh Language
Commissioner

Cefndir

Prif nod Comisiynydd y Gymraeg, sefydliad annibynnol a grëwyd yn unol â Mesur y Gymraeg (Cymru) 2011, yw hybu a hwyluso defnyddio'r Gymraeg. Gwneir hyn drwy ddwyn sylw i'r ffaith bod statws swyddogol i'r Gymraeg yng Nghymru a thrwy osod safonau ar sefydliadau. Bydd hyn, yn ei dro, yn arwain at sefydlu hawliau i siaradwyr Cymraeg.

Bydd dwy egwyddor yn sail i'r gwaith:

- Ni ddylid trin y Gymraeg yn llai ffafriol na'r Saesneg yng Nghymru
- Dylai personau yng Nghymru allu byw eu bywydau drwy gyfrwng y Gymraeg os ydynt yn dymuno gwneud hynny

Manylion Cyswllt:

- Ffôn: 0345 6033 221
- E-bost: post@comisiynyddygyymraeg.cymru
- Gwefan: comisiynyddygyymraeg.cymru

Comisiynydd y Gymraeg
Uned 2, Bloc C
Doc Fictoria
Caernarfon LL55 1TH

Cynnwys

| | | |
|---|--|----|
| 1 | Fframwaith Llywodraethiant | 1 |
| 2 | Rôl ac amcanion | 1 |
| 3 | Cynllun Strategol ac adolygu cynnydd gweithredol | 3 |
| 4 | Swydd y Comisiynydd | 3 |
| 5 | Trefniadau Llywodraethiant | 6 |
| 6 | Mesurau gweithredol eraill | 10 |
| 7 | Trosolwg gweledol o'r Fframwaith | 13 |
| 8 | Cyfnod adolygu | 14 |

1 Fframwaith Llywodraethiant

- 1.1 Mae'r Fframwaith hwn yn egluro ar ba sail y mae Comisiynydd y Gymraeg wedi ei sefydlu; y dull a ddefnyddir i'w lywodraethu a'i reoli; a sut y mae'n atebol am yr hyn y mae'n ei wneud.
- 1.2 Caiff Datganiad Llywodraethiant blynyddol ei pharatoi a'i chyhoeddi fel rhan o'r Adroddiad Blynyddol sy'n rhoi crynodeb o'r ffordd y mae'r Fframwaith hwn wedi ei roi ar waith yn ystod y flwyddyn.

2 Rôl ac amcanion

Mesur y Gymraeg (Cymru) 2011

- 2.1 Caiff rôl Comisiynydd y Gymraeg ('y Comisiynydd') ei sefydlu ym [Mesur y Gymraeg \(Cymru\) 2011](#) ('y Mesur').
- 2.2 Mae'r Mesur hefyd yn nodi mai prif nod y Comisiynydd yw hybu a hwyluso defnyddio'r Gymraeg. Wrth wneud hynny rhaid iddo weithio tuag at gynyddu:
 - darpariaeth gwasanaethau Cymraeg, a
 - cyfleoedd eraill i bobol ddefnyddio'r Gymraeg.
- 2.3 Mae'r Mesur yn nodi bod angen i'r Comisiynydd, wrth arfer ei swyddogaethau, roi sylw:
 - i statws swyddogol y Gymraeg yng Nghymru;
 - i'r dyletswyddau i ddefnyddio'r Gymraeg sydd wedi eu gosod a'r hawliau sy'n deillio o allu gorfodi'r dyletswyddau hynny;
 - i'r egwyddor na ddylai'r Gymraeg gael ei thrin yn llai ffafriol na'r Saesneg yng Nghymru; ac
 - i'r egwyddor y dylai personau yng Nghymru allu byw eu bywydau drwy gyfrwng y Gymraeg os ydynt yn dymuno gwneud hynny.

Swyddogaethau penodol

- 2.4 Mae holl bwerau a chyfrifoldebau'r Comisiynydd yn deillio o [Ran 2 o'r Mesur](#). Mae hyn yn cynnwys gweithredu fel rheoleiddiwr sydd â phwerau gorfodi.
- 2.5 Mae'r Mesur yn nodi'r ffordd mae'n rhaid i'r Comisiynydd weithredu mewn nifer o feysydd gwahanol yn cynnwys:
 - llunio adroddiad 5-mlynedd ar sefyllfa'r Gymraeg yn y cyfnod hwnnw;
 - sefydlu gweithdrefn ar gyfer ymchwilio i gwynion ynglŷn â gweithredoedd neu anweithiau'n ymwneud ag arfer swyddogaethau'r Comisiynydd;

- llunio adroddiad blynyddol;
- llunio dogfen polisi gorfodi;
- creu a chynnal cofrestr camau gorfodi;
- cyhoeddi cofrestr buddiannau ar gyfer pob deiliad swydd perthnasol (y Comisiynydd a'r Dirprwy Gomisiynydd);
- llunio amcangyfrif o incwm a gwariant swyddfa'r Comisiynydd a chyflwyno'r amcangyfrif i Weinidogion Cymru o leiaf 5 mis cyn dechrau'r flwyddyn ariannol y mae'n ymwneud a hi;
- cadw cofnodion cyfrifyddol priodol yn unol â chyfarwyddiadau a roddir, gyda chydysniad y Trysorlys, gan Weinidogion Cymru;
- cyflwyno'r cyfrifon a luniwyd ar gyfer blwyddyn ariannol i Archwilydd Cyffredinol Cymru heb fod yn hwyrach na 31 Awst yn y flwyddyn ariannol ganlynol.

2.6 Caiff y Comisiynydd hefyd wneud unrhyw beth sy'n briodol yn ei dyb ef er mwyn hybu a hyrwyddo defnyddio'r Gymraeg a gweithio tuag at sicrhau nad yw'r Gymraeg yn cael ei thrin yn llai ffafriol na'r Saesneg. Mae hynny'n cynnwys gwneud unrhyw un neu ragor o'r pethau canlynol:

- hybu cyfleoedd i ddefnyddio'r Gymraeg;
- annog arferion gorau o ran defnyddio'r Gymraeg;
- cynnal ymholiad i unrhyw fater sy'n ymwneud ag unrhyw un neu ragor o swyddogaethau'r Comisiynydd;
- cychwyn achos cyfreithiol yng Nghymru a Lloegr, neu ymyrryd mewn achos o'r fath os yw'n ymddangos i'r Comisiynydd fod yr achos yn un sy'n berthnasol i fater y mae gan y Comisiynydd swyddogaeth mewn cysylltiad ag ef;
- darparu cymorth i unigolyn os yw'r person hwnnw yn barti i achos cyfreithiol sy'n berthnasol i fater y mae gan y Comisiynydd swyddogaeth mewn cysylltiad ag ef;
- cadw'r gyfraith sy'n ymwneud â'r Gymraeg o dan arolygiaeth;
- llunio a chyhoeddi adroddiadau;
- gwneud gwaith ymchwil neu gomisiynu eraill i'w wneud;
- gwneud gweithgareddau addysgol neu gomisiynu eraill i'w gwneud;
- cyflwyno sylwadau i unrhyw berson;
- gwneud argymhellion i Weinidogion Cymru;
- rhoi cyngor i unrhyw berson.

Gwrthdaro mewn swyddogaethau

- 2.7 Gall y Comisiynydd fod mewn sefyllfa lle mae gwrthdaro rhwng dwy swyddogaeth y mae'n ei harfer. Mewn sefyllfa felly ni fydd un swyddogaeth yn cyfyngu ar y llall nac ychwaith yn dylanwadu ar y llall.
- 2.8 Pan gyfyd sefyllfaoedd o wrthdaro posibl dylai swyddogion a'r Comisiynydd arfer unrhyw swyddogaeth a/neu bŵer i'r pwrpas y'i bwriadwyd. e.e. Nid pwrpas ymchwilio i fethiant yw ceisio dylanwadu ar bolisi penodol na newid penderfyniad polisi ac ni fyddai'n briodol defnyddio'r swyddogaeth honno i geisio gwneud hynny.

- 2.9 Mewn sefyllfa o wrthdaro posibl dylai fod gan swyddogion a'r Comisiynydd resymau clir wedi eu dogfennu yn egluro pam eu bod yn arfer swyddogaeth neu bŵer neilltuol. Dylai'r Comisiynydd ei hun allu rhoi rheswm dros unrhyw weithred a gymerwyd ganddo. e.e. bydd rhesymau dros agor ymchwiliad wedi eu dogfennu mewn Ffurflen Ymresymu ac yn seiliedig ar ffeithiau perthnasol i amheuaeth o fethiant i weithredu safon.

3 Cynllun Strategol ac adolygu cynnydd gweithredol

- 3.1 Gweledigaeth y Comisiynydd yw **Cymru lle gall pobl fyw eu bywyd yn Gymraeg**.
- 3.2 Er mwyn cyfrannu tuag at gyflawni'r weledigaeth honno, mae'r Comisiynydd wedi gosod cyfres o amcanion strategol canlynol o fewn [Cynllun Strategol](#). Caiff cynnydd yn erbyn pob amcan strategol ei fesur drwy gyfres o ddangosyddion ac mae'n sail i'r gweithgareddau a'r prosiectau a nodir yn y cynllun gweithredol blyneddol.
- 3.3 Caiff y cynllun gweithredol ei adolygu bob chwarter fesul tîm gan y Tîm Arwain a caiff crynodeb perthnasol ei rannu gyda'r Panel Cyngori a'r Pwyllgor Archwilio a Risg.

Gwerthoedd

- 3.4 Mae'r Comisiynydd wedi ymrwymo i weithredu yn unol â'r gwerthoedd craidd canlynol:
- Mae **dangos parch** at bawb yn ganolog i bopeth a wnawn;
 - Mae bod yn **agored** ac **ymddiried** yn ein gilydd yn sylfaen i ddiwylliant ein gweithle;
 - Mae **tegwch, gonestrwydd a chysondeb** yn greiddiol i bob agwedd ar ein gwaith.
 - Mae **cydweithio gydag eraill** mewn ffordd briodol a blaengar yn bwysig i ni.

4 Swydd y Comisiynydd

Corfforaeth un dyn

- 4.1 Corfforaeth un dyn yw'r Comisiynydd o ran endid cyfreithiol. Mae hyn yn golygu bod y corff yn cynnwys un swydd gorfforedig a gaiff ei chyflawni gan un person.
- 4.2 Y Comisiynydd felly sy'n gyfrifol ac yn atebol am gynnal a gweinyddu'r holl waith a wneir gan y corff a gwneir pob penderfyniad yn enw ac ar ei ran.

Penodi

- 4.3 Penodir y Comisiynydd gan Brif Weinidog Cymru am gyfnod penodol untro o 7 mlynedd. Caiff y swydd a'r holl bwerau cysylltiedig ei throsglwyddo o un deilydd swydd i'r nesaf.
- 4.4 Caiff cyflog blynyddol y Comisiynydd ei bennu gan Brif Weinidog Cymru a fydd yn cymryd ystyriaeth o argymhellion y Corff Adolygu Cyflogau Uwch-swyddogion (SSRB), sef y corff perthnasol sy'n cynghori ar lefelau tâl y sector cyhoeddus.

Perthynas â Llywodraeth Cymru

- 4.5 Mae'r swydd yn annibynnol ar lywodraeth.
- 4.6 Mae'r Comisiynydd yn adrodd ar ei holl weithgareddau drwy Adroddiad Blynyddol statudol a amlinellir yn adran 18 y Mesur. Yn ogystal, bydd Cyfrifon Blynyddol yn cael eu cynhyrchu o dan drefniadau y cytunwyd arnynt gyda'r Trysorlys; mae'r rhain yn ddarostyngedig i'w harchwilio gan Archwilio Cymru. Caiff yr Adroddiad Blynyddol a'r Cyfrifon eu cyhoeddi gyda'i gilydd.
- 4.7 Mae swyddogaethau'r Comisiynydd yn berthnasol i Senedd Cymru ac mae'r Pwyllgor Diwylliant yn craffu ar ein gwaith ac yn ein gwahodd i roi tystiolaeth arbenigol yn ôl yr angen. Rydym yn cael ein cyllido gan Weinidogion Cymru ac mae ein perthynas strategol yn cael ei ddiffinio mewn memorandwm cyd-ddealltwriaeth gyda Llywodraeth Cymru.

Swyddog Cyfrifyddu ac atebolrwydd

- 4.8 Mae [paragraff 16, Atodlen 1 o'r Mesur](#) yn nodi mai'r Comisiynydd yw Swyddog Cyfrifyddu y sefydliad ac sydd â'r cyfrifoldebau a nodir o bryd i'w gilydd gan y Trysorlys, mewn perthynas â chyfrifon a chyllid y sefydliad.
- 4.9 Mae'r Comisiynydd wedi cytuno i ymrwymo i'r fframwaith ac egwyddorion fel sydd wedi ei nodi o fewn [Llawlyfr Rheoli Arian Cyhoeddus Cymru](#) a '[Managing public money](#)'. Mae Pennod 3 o fewn y ddwy ddogfen yn manylu ar brif gyfrifoldebau Swyddog Cyfrifyddu.
- 4.10 Mae [paragraff 16, Atodlen 1 o'r Mesur](#) yn nodi cyfrifoldebau'r Comisiynydd, fel y Swyddog Cyfrifyddu, sydd yn ddyledus i Weinidogion Cymru, Senedd Cymru, Pwyllgor Cyfrifon Cyhoeddus y Senedd, y Tŷ Cyffredin, a/neu Bwyllgor Cyfrifon Cyhoeddus y Tŷ Cyffredin.
- 4.11 Mae gan Swyddog Cyfrifyddu gyfrifoldeb personol dros:
 - Priodoldeb a rheoleidd-dra cyllid cyhoeddus maent yn atebol am;
 - Gadw cyfrifon priodol;
 - Weinyddu doeth a darbodus;
 - Osgoi gwastraff a gormodedd;
 - Defnyddio pob adnodd yn effeithlon ac effeithiol.

4.12 Yn benodol mae disgwyl i Swyddog Cyfrifyddu:

- lofnodi cyfrifon gan dderbyn cyfrifoldeb personol dros sicrhau eu bod yn cael eu cyflwyno'n briodol;
- sicrhau bod gweithdrefnau ariannol priodol yn cael eu dilyn;
- reoli cyllid cyhoeddus yn briodol ac yn dda, a sicrhau bod cyllid sydd yn nwylo unrhyw swyddog yn cael ei wirio drwy drefniant annibynnol ac effeithiol;
- rheoli a diogelu asedau sydd o dan eu gofal yn dda;
- rhoi ystyriaeth ariannol berthnasol i unrhyw gynigion polisi sy'n ymwneud a gwariant neu incwm y mae'n gyfrifol am (gan gynnwys fforddiadwyedd, chynaliadwyedd, gwerth am arian ayyb)
- rheoli cyfleodd a risgiau
- cynllunio gwaith ymchwil a gwerthuso i asesu effeithlonrwydd a gwerth am arian amcanion strategol a rhaglenni gwariant
- rhoi trefniadau priodol mewn lle i wrthsefyll twyll;
- sicrhau fod gan reolwyr weledigaeth glir o'u hamcanion a'r modd i asesu;
- sicrhau bod cyfrifoldebau clir wedi ei aseinio i reolwyr gan gynnwys craffu'n feirniadol ar allbwn a gwerth am arian, a bod hyfforddiant, gwybodaeth a mynediad parhaus i gyngor arbenigol sydd ei angen arnynt i gyflawni eu cyfrifoldebau yn effeithiol;
- sicrhau bod trefniadau dirprwyo yn hyrwyddo rheoli da a bod y staff angenrheidiol sydd â chydbwysedd sgiliau priodol ar gael i gefnogi
- sicrhau rheoleidd-dra a phriodoldeb gwariant;
- ymddangos gerbron Pwyllgor Cyfrifon Cyhoeddus y Senedd neu Bwyllgor Cyfrifon Cyhoeddus Tŷ'r Cyffredin.

Swyddogion a threfniadau dirprwyo

4.13 Cefnogir y Comisiynydd gan swyddogion sy'n cael eu cyflogi gan, ac yn gweithio i'r, Comisiynydd.

4.14 Yn unol ag [adran 12 o'r Mesur](#) mae'n rhaid i'r Comisiynydd gael cymeradwyaeth Gweinidogion Cymru ar gyfer:

- y nifer y staff y caniateir eu penodi;
- telerau ac amodau gwasanaeth y staff; a
- taliadau a wneir o dan adran 12 (3) i (5) o'r Mesur sydd yn cynnwys tâl cydnabyddiaeth, unrhyw lwfansau a phensiynau.

4.15 Er mai'r Comisiynydd, fel corfforaeth un dyn, sydd â'r holl bwerau a dyletswyddau ffurfiol, mae [adran 13 o'r Mesur](#) yn nodi caiff y Comisiynydd ddirprwyo unrhyw un neu ragor neu'r oll o swyddogaethau'r Comisiynydd i aelod o'i staff. Mae'r Comisiynydd felly wedi dirprwyo cyfrifoldebau i staff i arfer rhai o'i ddyletswyddau statudol yn cynnwys y rolau statudol canlynol:

| Cyfrifoldeb statudol | Cyflawnir gan |
|--|--|
| <ul style="list-style-type: none"> Uwch Berchennog Risg Gwybodaeth (SIRO) Uwch Berchennog Risg Swyddog Diogelu Data | Cyfarwyddwr Llywodraethiant a Gwasanaethau Corfforaethol |
| <ul style="list-style-type: none"> Swyddog Iechyd a Diogelwch | Uwch Swyddog Adnoddau Dynol |

4.16 Yn ogystal, mae'r Comisiynydd wedi dirprwyo ei gyfrifoldeb o gynnig cyngor ar ffurfiau safonol enwau lleoedd yng Nghymru i'r [Panel Safoni Enwau Lleoedd](#) ac ni fydd yn ymyrryd yn ymarferol gyda'r gwaith yma fel mater o drefn.

4.17 Mae argymhellion y Panel yn cael eu rhannu'n gyhoeddus drwy'r [Rhestr o Enwau Lleoedd Safonol](#) ar ein gwefan. Yn ogystal mae Canllawiau Safoni Cenedlaethol wedi eu cyhoeddi [yma](#).

Dirprwy Gomisiynydd

4.18 Mae'n ofynnol o dan [adran 12 o'r Mesur](#) i'r Comisiynydd benodi Dirprwy Gomisiynydd.

4.19 Bydd Prif Weinidog Cymru yn penodi Dirprwy Gomisiynydd os yw swydd y Comisiynydd yn wag, neu os yw'n ymddangos i Brif Weinidog Cymru y bydd y Comisiynydd methu â phenodi Dirprwy Gomisiynydd.

Gweithio'n gyfochrog â sefydliadau eraill

4.20 Wrth wneud ei waith, bydd y Comisiynydd yn cydweithio gyda nifer o sefydliadau eraill er lles y Gymraeg. Gall hynny olygu llunio memorandwm cyd-ddealltwriaeth i gadarnhau sut bydd hynny'n digwydd.

4.21 Yn yr un modd, mae'r Mesur yn galluogi'r Comisiynydd i weithio ar y cyd ag Ombwdsmyr a Chomisiynwyr eraill ar ymchwiliadau safonau, neu ymchwiliadau eraill.

4.22 Yn unol a Deddf Llesiant Cenedlaethau'r dyfodol (Cymru) 2015 mae Comisiynydd y Gymraeg yn aelod o Banel Cyngori Comisiynydd Cenedlaethau'r Dyfodol Cymru.

5 Trefniadau Llywodraethiant

5.1 Manylir yma ar y prif systemau a phrosesau sydd mewn lle o fewn y sefydliad i sicrhau trefniadau llywodraethiant priodol a chadarn.

Tîm Arwain

- 5.2 Mae'r Comisiynydd wedi sefydlu [Tîm Arwain](#) sy'n cynnwys y Comisiynydd ei hun a'r holl Gyfarwyddwyr yn y strwythur staffio. Cyfrifoldeb y Tîm Arwain yw cynorthwyo'r Comisiynydd i osod cyfeiriad a chynnal gorolwg strategol dros y Cynllun Strategol a'r Cynllun Gweithredol.
- 5.3 Yn y pen draw, y Tîm Arwain yw'r prif fforwm ar gyfer gwneud penderfyniadau strategol am faterion gweithredu, adnoddau, cyfathrebu a materion gweinyddol eraill er mwyn gweithredu'r cynllun strategol a'r holl brosesau cynllunio busnes eraill, ac ar gyfer monitro perfformiad a gwariant.
- 5.4 Mae'r Tîm Arwain yn gyfrifol am:
- ddiffinio a chymeradwyo cyfeiriad strategol gwaith y Comisiynydd a gosod amcanion heriol;
 - cynnig arweiniad strategol effeithiol fel y gall y Comisiynydd fodloni ei gyfrifoldebau a'i ddyletswyddau o dan Fesur y Gymraeg (2011);
 - gwneud penderfyniadau gwybodus a thryloyw;
 - cynllunio busnes a rhaglennu gwaith gyda ffocws ar werth am arian;
 - sicrhau bod gweithgareddau'r Comisiynydd yn cael eu cynnal mewn modd effeithlon ac effeithiol;
 - hyrwyddo safonau uchel o ran cyllid cyhoeddus, gan gynnal egwyddorion rheoleidd-dra, priodoldeb a gwerth am arian;
 - goruchwyllo a monitro perfformiad lefel uchaf, er mwyn sicrhau bod y Comisiynydd yn llwyr gyflawni ei amcanion;
 - arddangos safonau uchel o ran llywodraethau corfforaethol ac uniondeb a sicrhau bod trefniadau effeithiol ar waith er mwyn rhoi sicrwydd o ran rheoli risg a rheolaeth fewnol;
 - arddangos gwerthoedd y Comisiynydd ym mhob peth a wneir.
- 5.5 Mae rôl y Tîm Arwain o ran penderfyniadau yn cydnabod, ar adegau, y bydd rhai materion y mae'r Comisiynydd ei hun yn penderfynu arnynt. Yn yr un modd, mae gan y Comisiynydd yr hawl, fel corfforaeth un dyn i wneud penderfyniadau sydd yn groes i farn y mwyafrif o'r Tîm Arwain. Disgwylir mai eithriad fydd y sefyllfaoedd hyn a bydd yn cael ei nodi'r glir o fewn cofnodion unrhyw gyfarfod pan fo hynny'n berthnasol.
- 5.6 Caiff penderfyniadau am waith rheoleiddio'r Comisiynydd eu gwneud y tu allan i'r Tîm Arwain yn y Cyfarfod Dyfarnu (gweler isod).

Cyfarfod Dyfarnu

- 5.7 Mae prosesau statudol i'w dilyn wrth i'r Comisiynydd fynd ati i arfer rhai o'i swyddogaethau, er enghraifft nid yw penderfyniadau gorfodi wedi eu dirprwyo i swyddogion. Y Comisiynydd ei hun felly sy'n gwneud pob penderfyniad a nodir yn rhai o'i eiddo yn Rhannau 4 - 6 Mesur y Gymraeg (Cymru) 2011. Mae Polisi Gorfodi'r Comisiynydd yn manylu ar rai o'r agweddau sydd ynghlwm a'r prosesau hynny.

- 5.8 Y Cyfarfod Dyfarnu yw'r fforwm trafod yng nghyswllt penderfyniadau Rhan 4- 6 o'r Mesur y Gymraeg (Cymru 2011).
- 5.9 Bydd y cyfarfodydd yma'n digwydd yn rheolaidd (pob pythefnos fel rheol) a bydd y staff sydd angen penderfyniad y Comisiynydd ar unrhyw fater yn cyflwyno papur ar gyfer y cyfarfod ac yna'n cyflwyno'r eitem. Bydd y Comisiynydd yn cael cyfle i ystyried y rhesymu ym mhob achos ac i ofyn am fwy o fanylion, neu/a gwneud dyfarniad.
- 5.10 Dim ond penderfyniadau nad ydynt wedi eu dirprwyo i swyddogion fydd yn cael sylw yn y cyfarfod. Gan fod rhai achosion yn cyrraedd Tribiwnlys y Gymraeg, bydd y cyfarfod hefyd yn cytuno safbwynt a datganiadau achos ar gyfer Tribiwnlys y Gymraeg ac unrhyw benderfyniadau yn sgil yr achosion rheini.
- 5.11 Mae swyddogion yn gweithredu yn unol a gweithdrefnau cadarn sydd yn seiliedig ar arweiniad cyfreithiol, y Polisi Gorfodi lle'n berthnasol ac ar ofynion Mesur y Gymraeg.

Panel Cyngori Comisiynydd y Gymraeg

- 5.12 Mae [Adran 23 o'r Mesur](#) yn darparu ar gyfer sefydlu panel o gynghorwyr i'r Comisiynydd a gaiff ei alw'n Banel Cyngori Comisiynydd y Gymraeg (y 'Panel'). Penodir y Panel gan Weinidogion Cymru. Rhaid i'r Panel gynnwys rhwng 3 a 5 aelod ar unrhyw amser.
- 5.13 Nid yw aelodau'r Panel yn gyflogeion i Lywodraeth Cymru. Mae [Atodlen 4 o'r Mesur](#) yn amlinellu agweddau penodi, tâl cydnabyddiaeth, lwfansau a phensiynau, telerau penodi, cyfnod penodiad a rheoliadau penodi aelodau'r Panel.
- 5.14 Nid yw'r Comisiynydd yn atebol i'r Panel ond caiff y Comisiynydd ymgynghori â'r Panel Cyngori ynghylch unrhyw fater. Gall hynny fod yn unrhyw un neu ragor neu bob un o aelodau'r Panel.
- 5.15 Rôl y Panel yw cynghori'r Comisiynydd mewn perthynas â swyddogaethau'r Comisiynydd yn unol â'r Mesur. Mae'r Comisiynydd yn gofyn i'r Panel am gyngor ar ei berfformiad yn erbyn ei gynllun gweithredol a'i amcanion strategol.
- 5.16 Mae [Cylch Gwaith Panel Cyngori'r Comisiynydd](#) yn cofnodi dyletswyddau'r Panel ynghyd â materion eraill megis y cyfarfodydd, ysgrifenyddiaeth y Panel, trefniadau talu, rhoddion a lletygarwch a buddiannau.
- 5.17 Bydd aelodau'r Panel yn dal eu swydd yn ddarostyngedig i delerau eu penodiad. Bydd person yn aelod o'r Panel am gyfnod o 3 blynedd. Yn amodol ar adolygiad, mae posibilrwydd y bydd modd adnewyddu aelodaeth am 3 blynedd pellach. Bydd aelodau yn gweithio lleiafswm o 8 diwrnod y flwyddyn.
- 5.18 Pan fydd tymor aelodau'r Panel yn dod i ben, fe fydd Gweinidogion Cymru yn trafod â'r Comisiynydd er mwyn adnabod anghenion am arbenigedd y Panel cyn mynd ati i ddechrau proses penodiadau cyhoeddus.
- 5.19 Mae aelodaeth y [Panel Cyngori](#) i'w gweld ar wefan y Comisiynydd.

Pwyllgor Archwilio a Risg

- 5.20 Fel Swyddog Cyfrifyddu, mae'r Comisiynydd yn gyfrifol am sicrhau bod y sefydliad yn cael ei rhedeg mewn ffordd ddarbodus, effeithiol ac effeithlon er mwyn sicrhau gwerth am arian cyhoeddus. Er nad oes unrhyw ofyniad statudol i wneud hynny, mae'r Comisiynydd wedi sefydlu Pwyllgor Archwilio a Risg (y 'Pwyllgor') fel pwyllgor sefydlog i ddarparu cymorth a sicrwydd i'r Swyddog Cyfrifyddu a'r Tîm Arwain ar ddigonolrwydd ac effeithiolrwydd rheolaeth fewnol, risg a llywodraethiant. Mae'r Pwyllgor hefyd yn goruchwyllo trefniadau archwilio mewnol ac allanol sy'n cwmpasu holl feysydd gwaith y Comisiynydd.
- 5.21 Y Comisiynydd fydd yn penderfynu aelodaeth a chylch gorchwyl y Pwyllgor hwn. Bydd y Comisiynydd yn penodi o leiaf 3 unigolyn i fod yn rhan o'r Pwyllgor drwy hysbyseb allanol. Ni fydd aelodau Panel Cyngchori Comisiynydd y Gymraeg yn cael bod yn aelodau o'r Pwyllgor. Bydd tymor penodiad pob aelod yn gyfnod o 3 blynedd. Yn amodol ar adolygiad boddhaol, mae'n bosibl y bydd modd adnewyddu'r penodiad am ail dymor o 3 blynedd yn unig. Bydd gan y Pwyllgor drefn flynyddol ar gyfer Rheoli Perfformiad aelodau.
- 5.22 Gall y Pwyllgor benodi aelodau ychwanegol am gyfnod hyd at 12 mis i ddarparu sgiliau, gwybodaeth neu brofiad arbenigol. Gall y Pwyllgor brynu mewn cyngor arbenigol ar gost y sefydliad, hyn yn amodol ar gyllidebau a gytunwyd gan y Comisiynydd.
- 5.23 Mae aelodaeth y [Pwyllgor Archwilio a Risg](#) i'w gweld ar wefan y Comisiynydd.
- 5.24 Mae mwy o wybodaeth am y Pwyllgor a'u dyletswyddau i'w canfod o fewn [Cylch Gwaith y Pwyllgor](#). Mae'r Cylch Gwaith yn nodi, ymysg pethau eraill, Rheolau Cyffredinol y Pwyllgor, rhybudd am gyfarfodydd, trefn busnes, cworwm, ymddygiad aelodau, a diddordebau'r aelodau.

Archwilwyr Mewnol ac Allanol

- 5.25 Mae swyddogaeth archwilio mewnol yn darparu gwerthusiad gwrthrychol, a barn ar ddigonolrwydd ac effeithiolrwydd cyffredinol y fframwaith llywodraethu, rheoli risg a rheolaeth.
- 5.26 Caiff y cynllun archwilio mewnol blynyddol ei baratoi gan yr archwilwyr a caiff ei gymeradwyo gan y Comisiynydd a'r Pwyllgor Archwilio a Risg.
- 5.27 Yn unol ag [Atodlen 1, Adran 5 o'r Mesur](#), Archwilydd Cyffredinol Cymru sydd yn gyfrifol am archwilio cyfrifon y Comisiynydd. Caiff Archwilydd Cyffredinol Cymru hefyd archwilio darbodaeth, effeithlonrwydd ac effeithiolrwydd y defnydd a wnaed o adnoddau wrth i swyddogaethau'r Comisiynydd gael eu cyflawni.

Tribiwnlys y Gymraeg

- 5.28 Mae Tribiwnlys y Gymraeg (y "Tribiwnlys") yn gorff statudol annibynnol. Sefydlwyd y Tribiwnlys ym mis Ebrill 2015 o dan [adran 120 o'r Mesur](#).

5.29 Mae'r Tribiwnlys yn delio gydag apeliadau yn erbyn penderfyniadau'r Comisiynydd mewn perthynas â safonau'r Gymraeg. Mae gan sefydliadau ac achwynwyr hawl i gyflwyno cais neu apêl i'r Tribiwnlys os ydynt yn anfodlon gyda phenderfyniad mewn perthynas â:

- safonau a osodwyd gan y Comisiynydd;
- canlyniad ymchwiliad gan y Comisiynydd;
- penderfyniad gan y Comisiynydd i beidio ag ymchwilio i gŵyn.

Achrediadau annibynnol

5.30 Bydd y Comisiynydd yn ymgeisio am achrediadau annibynnol blynyddol mewn meysydd penodol fel diogelwch seibr er mwyn derbyn barn annibynnol arbenigol ar addasrwydd a digonolrwydd ei drefniadau llywodraethiant.

6 Mesurau gweithredol eraill

Rheoli Risg

- 6.1 Mae trefniadau rheoli risg y Comisiynydd yn cael ei arwain gan y Fframwaith Rheoli Risg. Mae'r Tîm Arwain yn adolygu risgiau gweithredol fel rhan o'r adolygiadau cynnydd chwarterol ar y cynllun gweithredol. Yn ogystal, caiff risgiau perthnasol eu nodi ym mhob papur a gyflwynir i'r Tîm Arwain. Caiff y risgiau hyn eu hymgorffori i'r Gofrestr Risg Strategol lle'n berthnasol.
- 6.2 Caiff risgiau ar lefel strategol eu hadolygu'n ffurfiol pob chwarter gan y Tîm Arwain gyda phroses adrodd yn dilyn hynny i'r Pwyllgor Archwilio a Risg. Mae'r Cyfarwyddwr Llywodraethiant a Gwasanaethau Corfforaethol yn gweithredu fel Rheolwr Risg ac Uwch Berchennog Risg Gwybodaeth y sefydliad a thrwy hynny yn gyfrifol am arwain ar gadw gorolwg dros holl risgiau'r sefydliad.
- 6.3 Mae'r Fframwaith risg yn cydnabod nad yw'n bosib dileu pob risg ond drwy'r Gofrestr Risg Strategol, caiff risgiau eu hadnabod a'u rheoli ac yna eu gostwng i lefel dderbyniol.

Strwythurau adrodd

- 6.4 Mae strwythur llywodraethu ffurfiol y Comisiynydd yn cael ei gefnogi gan strwythurau adrodd a sefydlwyd er mwyn rheoli a darparu sicrwydd ar feysydd penodol o bwys i'r Comisiynydd.

Effeithiolrwydd

- 6.5 Bydd y Tîm Arwain, Panel Cyngori a'r Pwyllgor Archwilio a Risg yn cynnal ymarfer hunan asesu unwaith y flwyddyn. Bydd yr ymarfer yma'n asesu adborth gan aelodau'r fforymau perthnasol, unrhyw wersi a ddysgwyd, a gwelliannu posibl.

Ymgynghori

- 6.6 Bydd y Comisiynydd yn ymgynghori gyda'r Pwyllgor Undeb ar bolisiâu a gweithdrefnau mewnol fydd yn effeithio ar swyddogion.

Cofrestr Buddiannau

- 6.7 Mae [Rhan 8, Pennod 1 o'r Mesur](#) yn ymwneud ag uniondeb cymeriad y Comisiynydd a'r Dirprwy Gomisiynydd. Yma, mae'n nodi bod angen i'r Comisiynydd a'r Dirprwy Gomisiynydd yn creu a chynnal cofrestr buddiannau. Rhaid i'r gofrestr hon gynnwys eu holl fuddiannau cofrestradwy. Mae copi o'r gofrestr buddiannau ar gyfer y Comisiynydd a'r Dirprwy Gomisiynydd ar gael i'w archwilio yn swyddfa'r Comisiynydd ac ar ein gwefan.
- 6.8 Mae [adrannau 135 i 137 o'r Mesur](#) yn gwneud darpariaeth gysylltiedig ynghylch cyhoeddi cofrestrau buddiannau, gwrthdrawiadau buddiannau, a dilysrwydd gweithredoedd deiliad swydd perthnasol. Mae'r rheoliadau hyn yn gyson â'r awydd i'r Comisiynydd a'r Dirprwy Gomisiynydd weithredu mewn ffordd dryloyw, atebol a diduedd, gan gadw at y safonau uchaf o briodoldeb wrth reoli eu busnes
- 6.9 Ni all y Comisiynydd arfer swyddogaethau os oes buddiant wedi ei gofrestru. Mewn achos o'r fath, dirprwyir y swyddogaeth honno i'r Dirprwy Gomisiynydd neu i aelod arall o staff y Comisiynydd.
- 6.10 Lle bo cwyn am fethiant i ddatgelu buddiant perthnasol, bydd y gŵyn yn cael ei chyfeirio at Gomisiynydd y Gymraeg. Bydd cwyn am fethiant Comisiynydd y Gymraeg ei hunan i ddatgelu buddiant yn cael ei gyfeirio at y Prif Weinidog.
- 6.11 Diweddarir y Gofrestr hon yn barhaus. Bydd yn cael ei diweddarau o fewn 4 wythnos i unrhyw fudd yn cael ei godi neu i'r deiliad fod yn ymwybodol o'r buddiant. Bydd y Cyfarwyddwr Llywodraethiant a Gwasanaethau Corfforaethol yn gyfrifol am sicrhau bod y gofrestr yn cael ei ddiweddarau pob 6 mis.
- 6.12 Er mwyn bod yn agored a thryloyw, bydd buddiannau aelodau'r Panel Cynghori, y Pwyllgor Archwilio a Risg a hefyd y Tîm Arwain llawn yn cael eu cyhoeddi ar ein gwefan, er nad oes gofyniad i'r sefydliad wneud hyn.
- 6.13 Yn ychwanegol i'r uchod, ac er mwyn sicrhau llywodraethu cadarn, mae'n ofynnol i holl staff y Comisiynydd gwblhau datganiadau buddion pob 6 mis. Mae hyn wedi ei nodi o fewn Cod Ymddygiad Staff. Bydd datganiadau buddion swyddogion yn cael eu cadw'n gyfrinachol. Bydd gan Reolwyr Llinell fynediad at ffurflenni aelodau eu tîm. Cedwir yr hawl i drafod eu cynnwys gyda'r swyddogion perthnasol os rhagwelir unrhyw botensial am wrthdaro wrth gyflawni dyletswyddau arferol eu swyddi.

Datgan buddiannau mewn cyfarfodydd

- 6.14 Dylai unrhyw ddiddordeb gael ei ddatgan cyn dechrau trafod unrhyw eitem berthnasol ar agenda Tîm Arwain, Pwyllgor Archwilio a Risg, Panel Cynghori, neu Gyfarfod Dyfarnu.

6.15 Dylid nodi'r datganiad heb ystyried a yw'r buddiant eisoes wedi cael ei gofnodi yn y Gofrestr. Unwaith y bydd y diddordeb wedi cael ei ddatgan mewn cyfarfod, gall y Tîm neu'r Pwyllgor benderfynu:

- caniatáu cyfranogiad llawn yr unigolyn wrth drafod yr eitem;
- caniatáu i'r unigolyn gymryd rhan mewn trafodaethau, ond heb hawl i bleidleisio;
- gofyn i'r unigolyn adael y cyfarfod ar gyfer yr eitem ar yr agenda.

Derbyn rhoddion, gwobrwyon a lletygarwch

6.16 Mae'n hollbwysig bod y Comisiynydd yn parhau, ac yn cael ei hystyried, yn annibynnol. Fel rhan o hyn, mae'n rhaid i staff y Comisiynydd ymddangos yn ddiuedd ac amhleidiol.

6.17 Er mwyn osgoi'r posibilrwydd o unrhyw honiad o lwgrwobrwyo neu gyfaddawdu, mae'r Comisiynydd yn cadw cofrestr o unrhyw nwyddau, rhodd a lletygarwch sy'n cael eu derbyn a'u gwrthod gan y Comisiynydd ac aelodau staff yn ystod eu dyletswyddau. Mae Cod Ymddygiad Staff yn egluro mwy am y broses y mae disgwyl i aelodau staff ddilyn mewn sefyllfaoedd lle byddent yn cael cynnig unrhyw rodd.

6.18 Mae hefyd disgwyl i aelodau'r Panel Cyngori a'r Pwyllgor Archwilio a Risg hysbysebu'r ysgrifenyddiaeth am unrhyw gynigion o roddion neu letygarwch a wnaed ac unrhyw gynigion a wrthodwyd. Dylid sicrhau cofnodi unrhyw roddion neu letygarwch a dderbyniwyd neu gwrthodwyd ar Gofrestr Rhoddion. Bydd disgwyl i aelodau gydnabod y bydd materion rhoddion a lletygarwch yn agored i graffu cwbl gyhoeddus.

Cod ymddygiad

6.19 Mae'r Comisiynydd wedi mabwysiadu Cod Ymddygiad sy'n amlinellu'r safonau ymddygiad y mae disgwyl i holl swyddogion ei arddel. Mae'r cod wedi ei seilio ar y saith egwyddor mewn bywyd cyhoeddus sef: anhunanoldeb, cywirdeb, gwrthrychedd, atebolrwydd, didwylledd, gonestrwydd ac arweinyddiaeth.

Twyll

6.20 Mae gan y Comisiynydd weithdrefnau a pholisïau ar waith i sicrhau nad yw'r sefydliad yn goddef twyll. Caiff Cofrestr Risg Twyll ei hadolygu yn flynyddol a'i chymeradwyo gan y Tîm Arwain a'i rhannu gyda'r Pwyllgor Archwilio a Risg.

6.21 Yn ogystal, bydd y Comisiynydd a'r Pwyllgor Archwilio a Risg yn ymateb i holiadur Archwilio Cymru ar lefelau rheolaeth mewnol yn ymwneud â thwyll fel rhan o'r archwiliad blynyddol.

Trefniadau Chwythu'r Chwiban


6.22 Mae gan y Comisiynydd Bolisi Chwythu'r Chwiban mewn lle. Mae manylion cyswllt Cadeirydd y Pwyllgor Archwilio a Risg a rheolwr o fewn tîm Archwilwyr Mewnol y Comisiynydd wedi eu cynnwys yn y polisi fel unigolion y gall swyddogion godi pryderon gyda nhw.

Cwynion yn erbyn y sefydliad

6.23 Mae gan y Comisiynydd weithdrefn gwyno benodol os bydd unigolyn am gwyno am weithredoedd neu anweithiau'n ymwneud ag arfer swyddogaethau'r Comisiynydd.

7 Trosolwg gweledol o'r Fframwaith

7.1 Gyda'i gilydd mae'r trefniadau llywodraethiant sydd mewn lle yn rhoi tair haen o sicrwydd i'r Comisiynydd fel a ganlyn:



7.2 Mae'r haen gyntaf yn ymwneud â'r ffordd y mae gwaith a risgiau yn cael eu rheoli o ddydd i ddydd. Mae swyddogion, Uwch Swyddogion a Chyfarwyddwyr yn gyfrifol am sicrhau addasrwydd y polisiau gweithdrefnau a'r prosesau yn y meysydd perthnasol. Mae sicrwydd yn dod yn uniongyrchol gan y rhai sy'n gyfrifol am gyflawni gwaith, proses neu amcanion strategol.

- 7.3 Mae'r ail haen yn ymwneud â sut mae'r sefydliad yn goruchwylio rheolaeth y fframwaith. Mae'r Panel Cyngori, Pwyllgor Archwilio a Risg a'r Archwilwyr Mewnol yn gyrrff annibynnol ond sy'n gweithredu hyd-braich oddi wrth y Comisiynydd drwy roi cyngor i'r Comisiynydd ar addasrwydd ac effeithiolrwydd ei drefniadau llywodraethiant a chynghori ar y camau i'w cymryd lle bo angen gwella.
- 7.4 Yn olaf, mae'r trydydd haen yn ymwneud â derbyn sicrwydd o du allan y sefydliad ar y trefniadau llywodraethiant sydd mewn lle. Yn eu tro, mae gwaith yr archwilwyr allanol, Llywodraeth Cymru a Tribiwnlys y Gymraeg ynghyd â derbyn achrediadau annibynnol yn ffordd pellach o dderbyn sicrwydd annibynnol ar y ffordd mae'r Comisiynydd yn gweithredu ei swyddogaethau ac yn rheoli ei adnoddau.

8 Cyfnod adolygu

- 8.1 Caiff y Fframwaith Llywodraethiant ei hadolygu bob dwy flynedd.